

Sampah 'bayar' sewa rumah!

Inisiatif DBKL perkenal program 1C1R bantu penyewa selesai masalah tunggakan sewa



LAPORAN muka depan Harian Metro, semalam.

**Mohd Jamilul Anbia
Md Denin dan Redzuan
Muharam**
am@hmetro.com.my

Kuala Lumpur

Alternatif tukar sampah kitar semula untuk membayar tunggakan atau sewa bulanan kediaman Projek Perumahan Rakyat (PPR) dan Perumahan Awam (PA) didiami.

Itu antara inisiatif Dewan Bandaraya Kuala Lumpur (DBKL) menerusi Program 1C1R (1 Community 1 Recycle) yang mula diperkenalkan sejak Oktober tahun lalu.

Datuk Bandar Kuala Lumpur, Datuk Seri Mahadi Che Ngah, berkata, program itu tidak hanya menarik minat masyarakat mempraktikkan amalan kitar semula, malah mampu digunakan untuk membayar sewa rumah dan mendapatkan barangan makanan keperluan asas.

Menurutnya, menerusi konsep sistem 'barter', penghuni Projek Perumahan Rakyat (PPR) yang membawa barang kitar semula ke kios 1C1R akan mendapat

mata ganjaran atau 'green coin' yang boleh dikumpul.

"Ia kemudian boleh ditukar untuk membayar sewa rumah serta mendapatkan barangan keperluan harian.

"Misalnya, setiap satu kilogram (kg) sisa tin aluminium mewakili 12 mata ganjaran boleh ditukar dengan sepeket gula manakala setiap satu kilogram minyak masak terpakai boleh ditukar kepada mata ganjaran bernilai sekitar RM2.

"Jika dikumpulkan sehingga 1,240 mata ganjaran (50 kg), nilai itu boleh ditukarkan kepada sewa bulanan bernilai RM124," katanya.

Menurutnya, inisiatif rintis yang mula dilaksanakan di lima PPR sejak Oktober tahun lalu dilihat langkah positif untuk meringankan beban warga kota serta kaedah alternatif kepada penyewa PPR DBKL terutama golongan B40.

"Langkah ini akan dapat menjadi alternatif buat penghuni yang tak mampu membayar sewa sekali gus mengurangkan jumlah mereka yang mempunyai tunggakan. Walaupun sewa hanyalah RM124, ada yang tak



INISIATIF DBKL menerusi Program 1C1R membolehkan penghuni PPR dan PA membayar sewa menggunakan barangan terpakai.

mampu dan punya keaingan untuk membayarnya," katanya.

Mahadi berkata, projek rintis menawarkan pertukaran barangan kitar semula kepada barangan keperluan asas seperti minyak masak dan tepung dijalankan di PPR Seri Alam, PPR Beringin dan PPR Seksyen 2 Wangsa Maju manakala pertukaran kepada pembayaran sewa rumah PPR dilaksanakan dengan kerjasama Persatuan Sosio Ekonomi dan Alam Sekitar di PPR Pekan Kepong dan PPR Wangsa Sari.



PROGRAM 1C1R mula diperkenalkan sejak Oktober tahun lalu.